



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

*Komunikadu Imprensa  
Distritu Aileu  
15 Dezembru 2014*

**JSMP kontinia realiza treinamentu kona-ba justisa ba ema hotu iha Suku Bandudato  
Distritu Aileu**

Iha 11 Dezembru 2014, JSMP liuhosi Unidade Peskizador Jurídiku no Programa observasaun Parlemantu (POP) realiza treinamentu kona-ba justisa ba ema hotu iha comunidade Suku Bandudato, Sub-distritu Aileu Vila, Distritu Aileu.

Treinamentu ne'e partisipa hosi ema hamutuk na'in 31 ne'ebé kompostu hosi feto nain 16 no mane nain 15.

Materia treinamentu ne'ebé kobre durante treinamentu ne'e mak introdusaun baziku kona-ba direitus umanus, lei formal ne'ebé vigor iha Timor Leste, tipu kazu krime tuir lei aplikavel no oinsa atu asesu ba justisa formal wainhira sai nu'udar akuzadu ka hanesan vítima hosi krime ruma.

*"Treinamentu ne'e hanesan komitmentu JSMP nian hodi habelar informasaun kona-ba justisa formal ba comunidade sira iha suku ne'ebé menus informasaun kona-ba justisa formal. Espera katak ho materia ne'ebé partisipantes sira hetan bele ajuda sira atu kompriende diak liutan ita nia sistema justisa formal no bele hatene direfensia entre krime públiku no semi públiku," dehan Diretór Ezekutivu JSMP, Luis de Oliveria Sampaio.*

Xefe Suku Bandudato, Sr. Mario Viera da Costa iha sesaun abertura agradese ba prezensa no inisiativa JSMP relasiona ho atividade ne'e. Sr. Mario Viera da Costa haktuir katak atividade ne'e importante ba sira liu-liu ba joven sira atu ajuda sira kompriende diak liutan lala'ok prosesu justisa formal iha ita nia nasaun nune'e sira bele evita aan komete krime iha futuru.

Xefe Suku ne'e mós reafirma katak Suku Bandudato nafatin nakloke ba JSMP nia programa iha futuru atu kontinua kapasita comunidade sira kona-ba justisa.

JSMP observa katak partisipante sira ativu tebes hodi klarifika liu-liu kona-ba prosesu atu rezolve krime públiku no krime semi públiku, inklui kazu omisídiu no violasaun seksuál.

Atu asegura katak informasaun hirak ne'e bele too ba comunidade sira seluk, JSMP husu ba partisipante sira atu hatutan informasaun ne'ebé sira hetan ona ba comunidade sira ne'ebé la partisipa iha treinamentu refere.

Trenaimetu nee realiza tanba hetan apoiu husi Embaxada Canada.

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

Telefone:3323883 | 77295795

Website: [www.jsmp.tl](http://www.jsmp.tl)

Face book: [www.facebook.com/timorleste.jsmp](http://www.facebook.com/timorleste.jsmp)

Twitter: @JSMPTl